

Un paso mas dilanti den renobacion di compleho di Corte na Aruba como partido di plan di renobacion di Gabinete Mike Eman

Artista Arubiano Ciro Abath ta cuminsa crea un statua di Dama di Husticia

DIALUNA mainta a tuma un paso mas den loke ta e renobacion y embeyecemento di centro di ciudad. Minister di Infraestructura Benny Sevinger y Minister di Husticia Arthur Dowers den representacion di

Gabinete Mike Eman a firma e contract caminda ta pidi artista Arubiano Ciro Abath pa traha un estatua di Dama Husticia. E creacion lo forma parti di Willem de Zwijger Plein un bes cu e keda renoba y transforma. E



firma di e contract a tuma luga cu medianan di prensa como testigo na e luga mes, conoci popularmente como Plasa Alameda.

Bou coordinacion di Monumentenbureau a realisa un competencia entre artistanan local pa bin cu e miho diseño di Dama Husticia. E ta e simbolo universal di imparcialidad den husticia. "E trabou importante di renobacion di nos centronan ta continua. Awe nos ta un paso mas leu. Asina nos lo sigui te ora cu e master plan aki keda cla," Minister Sevinger a bisa. E trabou di e estatua y e plaza ta representa fase 4 y 5 den e proyecto di rescate di edificio di corte. Di e manera aki ta conecta e plaza, e edificio historico y e edificio moderno cu otro.

Sra. Yvonne Webb a splica cu a cuminsa basta tempo pasa cu e proceso pa cu e estatua. Satisfactoriamente a topa cu un interese grandi di nos artistanan y asina tambe a haya basta obra pa evalua. E comision encarga pa haci e escogencia adecua a consisti di representantenan di Ministerio di Infraestructura, Ministerio di Cultura, Corte di Husticia y Monumentenbureau. Di e manera ey, cada un a husga basa riba su criteria specifico. Pa loke ta e gasto, mescos cu e resto di e proyecto di restauracion y renobacion di edificio di Corte y e plaza, tur ta financiador di Fundacion Desaroyo Aruba.

E artista mes, Sr. Ciro Abath



a splica cu el a traha den contacto estrecho cu Monumentenbureau. "E exigencianan cu a pone ta cu mester tin cierto serenidad, seriedad y mester ta clasico den tur su apariencia." Adicionalmente el a splica na prensa cu e unico libertad cu e tabatin pa hinca algo di su mes tabata di por pone e blinddoek di glas y e base di e estatua den forma di calichi como un elemento cu ta representa nos isla su tereno. E estatua ta traha full di brons. Anochi e lo tin un luz cu ta bay laga e blinddoek briya. Abath a duna di conoce cu ya caba el a manda e modelonan aproba pa Hulanda, caminda e

lo keda pa tres luna cu ta necesario pa traha e estatua. Segun e artista, e ta un trabou basta intensivo. En todo caso, despues di e firma ayera mainta e contract di manera oficial, e trabou ta continua. Firma a tuma luga entre Ministernan Sevinger, Dowers, Ciro Abath y Edwin Roos representando Fondo Desaroyo Aruba. Ta bon pa menciona cu e estatua di Dama Husticia no ta bay reemplasa e obelisk cu ya caba tin pone riba Willem de Zwijger plein. E obra nobo lo ta ubica riba e plaza dilanti di e skina pariba di edificio di corte, banda di Hendrikstraat.